

„Apeiron“ jedan od organizatora poslovno-naučnog skupa o logistici u Zagrebu

KONFERENCIJA OKUPILA STRUČNJAKE, PRIVREDNIKE I LIDERE IZ OBLASTI LOGISTIKE I TRANSPORTA JUGOISTOČNE EVROPE

“Nastojimo dati smjernice i rješenja za dugogodišnje akumulirane probleme nedovoljnog stepena razvoja logističkih sistema u svim državama Jugoistočne Evrope“, poručili su naučni radnici, privrednici, predstavnici vladinih institucija regiona i čelnici renomiranih kompanija iz oblasti logistike i transporta na **Naučno-poslovnoj konferenciji o logistici i lancima snabdijevanja u Jugoistočnoj Europi “SEEB LOGISTICS-ZAGREB 2018”**, održanoj 5. novembra u Zagrebu.

Organizatori Konferencije su društvo **Southeast European Business Consulting Group d.o.o.**, iz Zagreba, **Fakultet prometnih znanosti Sveučilišta** u Zagrebu, **Panevropski univerzitet „Apeiron“** Banja Luka i Fakultet za logistiku iz Celja, Sveučilište u Mariboru.

Jasmin Bajić, predsjednik Uprave Croatia Airlines, Lukša Novak, direktor Zračne luke Split, Frano Luetić, direktor Zračne luke Dubrovnik, David Gabelica iz Zračne luke Zagreb, te ispred naučne zajednice doc. dr. sc. Ružica Škurla Babić, sa Fakulteta prometnih znanosti iz Zagreba bili su **panelisti sesije o logistici i SCM u zračnom saobraćaju**. Zaključak vodećih ličnosti renomiranih hrvatskih kompanija iz zračnog saobraćaja je da logistika i upravljanje lancima snabdijevanja u zračnom saobraćaju na nivou Republike Hrvatske ima niske vrijednosti i izuzetno nizak kapacitet iskorištenosti od potencijala i mogućnosti koje se trebaju učinkovitije upotrijebiti za unaprijeđenje robnih tokova u zračnom transportu. U okviru ovog dijela programa prezentovana su i tri naučno-istraživačka i razvojna projekta: *prof.dr.sc.Doris Novak, FPZ - Evropski naučno-istraživački projekat u vazduhoplovstvu (KAAT), doc.dr.sc.Diana Božić, FPZ - LoMI – internacionalizacijom preskačemo granice, i doc.dr.sc.Igor Štimac, ZL Zagreb -Zagreb Airport City.*

Konferencija je okupila više od 50 renomiranih učesnika iz vladinih, obrazovnih, naučnih, privrednih i javnih subjekata regije Jugoistočne Evrope, koji su diskutovali o stanju i izazovima razvojnih promjena u logistici i lancima snabdijevanja.

Predsjednici programskog i organizacionog odbora **prof.dr.sc.Tomislav Josip Mlinarić, dekan Fakulteta prometnih znanosti iz Zagreba** i **prof. dr. sc. Sanel Jakupović, dekan Fakulteta poslovne ekonomije Univerziteta „Apeiron“**, naglasili su ulogu i značaj logistike kao naučne discipline i njen uticaj na različite privredne i društvene mikrosisteme, kao i privrede država regije Jugoistočne Evrope. Skup je u ime dekana Fakulteta za logistiku iz Celja pozdravila **prof. dr.sc. Rebeka Lukman Kovačić**.

Dalibor Milošević, pomoćnik ministra za saobraćaj i pomorstvo u Vladi Crne Gore istakao je značaj ovakve vrste skupova koji bi trebalo da ponude relevantnim akterima, prije svih nadležnim vladama i institucijama zemalja Jugoistočne Evrope, smjernice i rješenja za dugogodišnje probleme nedovoljnog stepena razvoja logističkih sistema u svim državama (JIE).

Marijan Banelli iz Zagreba, akreditovani lobista za saobraćaj u Evropskoj komisiji, podijelio je vlastita dugogodišnja iskustva o saobraćajnim i logističkim sistemima iz prizme politika i strategija koje su zagovarane u proteklom periodu u Republici Hrvatskoj kao i ostalim zemljama Jugoistočne Evrope u poređenju sa legislativom i praksom Evropske unije, te je zaključio da su ove politike i strategije (u JIE)

bile nepotpune ili nedovoljno učinkovite da pokrenu sveobuhvatan investicijski ciklus, koji bi u srednjem i dugom roku osigurao razvojni progres, rast vrijednosti BDP-a, zaustavljanje odliva radne snage i podizanje na viši stepen nivoa konkurentnosti poslovnih sistema i privrede u cjelini.

Na konferenciji su organizovane četiri panel sesije sa vrhunskim panelistima koji su razgovarali u okviru užih tematskih područja logistike i lanaca snabdijevanja u poslovnim sistemima, te zračnom, željezničkom i cestovnom transportu, uz prestižne stručnjake ovih područja kao moderatore *prof. dr. sc. Velibora Peulića (IRU)*, *dr. sc. Mirka Tatalovića (FPZ)* i *doc. dr. sc. Vedrana Šupukovića (CIAK / RK PPD)*.

Izuzetno kvalitetan panel je održan u okviru sesije o **logistici i SCM u cestovnom i željezničkom transportu**, kojeg su predvodili *prof.dr.sc.Tomislav Josip Mlinarić* i *izv.prof.dr.sc.Mladen Nikšić*, *dekan i prodekan Fakulteta prometnih znanosti Sveučilišta u Zagrebu*, zatim *Marijan Banelli*, *akreditovani lobista za saobraćaj u Evropskoj komisiji*, *Josip Keleman* iz *Zajednice za UNP Hrvatske gospodarske komore* i *izv. prof. dr. sc. Ratko Stanković* sa *Fakulteta prometnih znanosti iz Zagreba*. Kao zaključak je rečeno da nema dovoljno potrebnih preduslova u svim zemljama JIE za razvoj logističkih sistema koji su utemeljeni na korištenju cestovne i željezničke infrastrukture, ili kombinovanjem ove dvije vrste transporta (multimodalni sustavi), u cilju jačanja i rasta konkurentne prednosti preduzeća i privrede u cjelini, i/ili zbog nedostatka adekvatnih vladinih politika i strategija ili, u slučaju postojećih strategija i politika, njihovog neučinkovitog provođenja i slično.

Na posljednjem panelu o **logistici i SCM poslovnih sistema** učestvovali su panelisti *prof.dr.sc.Kristijan Rogić (FPZ)*, *Miroslav Gabrić*, *menadžer za logistiku (Atlantic grupa)*, *Petar Šimić (Primacošped Zagreb)* i *mr. sc.M esud Ramić*, *konsultant (Adizes SEE)*. Predstavili su čitav niz primjera uticaja logističkih procesa na poslovanje kompanija u izuzetno izazovnom globalnom konkurentskom okruženju, te zaključili da privredni subjekti u zemljama JIE nemaju vremena za čekanje u odnosu na sporo sistemsko rješavanje pitanja vladinih politika i strategija i čimbenika koji unapređuju tržišni okvir za poslovanje domaćih kompanija. Zbog toga su kompanije primorane vršiti fleksibilizaciju i prilagođavanje globalnom tržišnom okruženju i vršiti preregistraciju kompanija u zemlje sa stimuliranim uslovima ili jednostavno i, neželjeno, gasiti poslovanje stečajnim postupcima, a na kraju likvidiranjem kompanija, otpuštanjem radnika i rasprodajom sredstava.

Konferencija je održana pod pokroviteljstvom Croatia Airlines Zagreb, Zračne luke Dubrovnik, Zračne luke Zagreb, Zračne luke Split, Atlantic Grupe, Inving inženjering Prijedor, Visoke škole "CEPS-Centar za poslovne studije" iz Kiseljaka, Visoke škole "Logos centar" Mostar, Carlsberg Croatia, Primacošped Zagreb i Rident poliklinike iz Rijeke.

Banja Luka, 06. novembar 2018. godina

Služba za odnose sa javnošću